

Акафист
Пресвятой Богородице
в честь иконы Ея «Избавительница»

Празднование 17 (4) апреля и 30 (17) октября

Кондак 1

Возбрани врагом нашим озлобляти нас и от Господа нашего отлучати конечно и нас научи пети Тебе, Богородице, весело:

Радуйся, от горя, бед и гибели спасающая нас, бедствующих Избавительнице.

Икос 1

Ангелов множество по Твоему, Мати наша, повелению ополчаются на избавление наше грозно. Ты же прими молитву сию:

Радуйся, ангелов на спасение наше посылающая; радуйся, Царице горних чинов, небесную их помощь нам дарующая. Радуйся, ангелом хранити нас повелевающая; радуйся, воинством ангельским врагов наших поражающая.

Радуйся, от горя, бед и гибели спасающая нас, бедствующих Избавительнице.

Кондак 2

Видят бедствующие толикую и многую помощь Твою сердечно Тя призывающим и наставляются тем пети Сыну Твоему непрестанно: Аллилуия.

Икос 2

Разумеют мнози, яко мирови Тя дарова Сын Твой избавительницу бедствующим, темже поем Тя сице:

Радуйся, бедствующих Мати; радуйся, страждущих утешение. Радуйся, болящих исцеление; радуйся, ненадежных надеждо.

Радуйся, от горя, бед и гибели спасающая нас, бедствующих Избавительнице.

Кондак 3

Сила Вышняго даровася Ти на помощь и спасение миру и нас, в бедах погибающих. И кто Тобою не избавлен бысть, и кто же не поет Сыну Твоему: «Аллилуия»?

Икос 3

Имущи непостижимую любовь к роду человеку, кая въздыхания не прияла еси, кия слезы не отерла еси, и кого не принудила еси призывати Тя? Темже прими от нас похвалы сия:

Радуйся, бедствующих скорое услышание; радуйся, погибающих известное спасение. Радуйся, печальных и скорбных утешение; радуйся, плененных освобождение.

Радуйся, от горя, бед и гибели спасающая нас, бедствующих Избавительнице.

Кондак 4

Буря несчастий налете на ны, спаси убо нас погибающих, спаси, Избавительнице наша, бурю гибельную на земли Укротившаго показующая нам и приемлющаго нашу песнь: Аллилуия.

Икос 4

Слышаша человечестии роди всю Твою к христианам дивную любовь и Твое мощное избавление их от всяких находящих на них лютых, научишася пети Тебе:

Радуйся, человеческого рода от бед избавление; радуйся, бурь житейских прекращение. Радуйся, уныния прогонительнице; радуйся, радости по скорби нам подательнице.

Радуйся, от горя, бед и гибели спасающая нас, бедствующих Избавительнице.

Кондак 5

Боготечней звезде подобящися, мрак и темноту в грехолюбивых сердцах разгоняючи, да во свете Твоея любви узрят Господа и воспоют Ему: Аллилуия.

Икос 5

Видеша людие Российстии Твое не чаянное от многообразных бед избавление, радостно поют Тебе сице:

Радуйся, в бедах наша помощнице; радуйся, скорбей наших отъятие. Радуйся, печалей наших отгнание; радуйся, в скорбех наших утешение.

Радуйся, от горя, бед и гибели спасающая нас, бедствующих Избавительнице.

Кондак 6

Проповедуют помощь Твою и любовь, Мати, исцелении, утешении, обрадовании и спасении Тобою от бед, и поют Твоему высокодержавному Сыну: Аллилуия.

Икос 6

Возсиял есть нам свет спасения во мгле погибели, окружившей нас, и наставил пети Тебе, Владычице:

Радуйся, мрак душ наших просвещающая; радуйся, тьму греховную потребляющая. Радуйся, светом радости души ободряющая; радуйся, мглу греха разгоняющая.

Радуйся, от горя, бед и гибели спасающая нас, бедствующих Избавительнице.

Кондак 7

Хотящим нам конечному отчаянию предатися, отовсюду бедамлежащим, помыслихом же о Тебе, Избавительнице, и ободримся и утешимся, поюще Сыну Твоему: Аллилуия.

Икос 7

Новую и нежданную показала еси нам милость Свою, под державную руку Твою нас восприимши, и отовсюду вопием Ти:

Радуйся, Царице державная; радуйся, и нас под Твою державу восприявшая. Радуйся, защиту Твою нам даровавшая; радуйся, врагов наших поразившая.

Радуйся, от горя, бед и гибели спасающая нас, бедствующих Избавительнице.

Кондак 8

Странное чудо: на погибель обреченнии и в нуждах томящихся безчисленни внезапу спасение и избавление получают от Тебе, поюще Богу: Аллилуия.

Икос 8

Все сущии во мраце скорбей, все обуреваемии несчастий бурею, приидите к доброму пристанищу и нашему поможению, покрову Девы избавительницы, вопиюще Ей:

Радуйся, радостей источнице; радуйся, печалей прогнание. Радуйся, бед избавление; радуйся, всяческаго покоя подательнице.

Радуйся, от горя, бед и гибели спасающая нас, бедствующих Избавительнице.

Кондак 9

Все существо человеческое хвалит Тя, все воспевают Тя, многоразличное избавление несущую, вместо печалей радость подающую поющим Сыну Твоему и Богу: Аллилуия.

Икос 9

Ветия многоумнии обезумеша, видяще Твое скорое чудесное от бед страждущих избавление, и умолкоша, нам поющим Ти:

Радуйся, чудесы мир удивившая; радуйся, чудесы нас укрепившая. Радуйся, безбожие чудесами истребившая; радуйся, врагов силою Божиею посрамившая.

Радуйся, от горя, бед и гибели спасающая нас, бедствующих Избавительнице.

Кондак 10

Спасти хотя всяку душу человекчу, всею любовию печешися о ней, дондеже научиши ю пети Сыну Твоему: Аллилуия.

Икос 10

Стеною, мир христианский хранящая и всяку душу от врагов ограждающая явися икона Твоя, Избавительнице, в мире православнем и чудесы прославися, Тебе людем Божиим воспевающим:

Радуйся, наставнице наша; радуйся, избавительнице наша. Радуйся, веселие наше; радуйся, вечная радости наша.

Радуйся, от горя, бед и гибели спасающая нас, бедствующих Избавительнице.

Кондак 11

Пение непрестанно приносим Ти, Владычице, Тобою избавленнии и Тобою паки радость обретшии и Божественному Сыну Твоему поющи радостно: Аллилуия.

Икос 11

Светосияющим светилом лучезарным во мраце греха явися нам икона Твоя, Избавительнице, наставляющая нас пети Тебе:

Радуйся, от глада нас избавляющая; радуйся, вредоносящее естество от растений отгоняющая. Радуйся, посеvy и леса, и все растущее от гибели спасающая; радуйся, земледельцев скорбящих утешение и труда их благословение.

Радуйся, от горя, бед и гибели спасающая нас, бедствующих Избавительнице.

Кондак 12

Благодать, от иконы Твоея, Избавительнице, текущая, исцелений струи подающая и сердца

веселием оживляющая, побеждает всех волею пети, Мати, Сыну Твоему и Богу: Аллилуия.

Икос 12

Воспеваем исцеления, от святых иконы Твоя бываемыя, воспеваем наипаче воскресение Анастасия отрока и воспевающе поем:

Радуйся, мертвых воскрешающая; радуйся, умершая сердца оживляющая. Радуйся, от смерти и вечного огня изымающая; радуйся, посмертное наше упование и защиту.

Радуйся, от горя, бед и гибели спасающая нас, бедствующих Избавительнице.

Кондак 13

О Всепетая, вселюбимая наша Мати! Умилосердися ныне и помилуй, в лютых и безысходных сущих нас скорбех избавляющи, научи нас сердечно воспевати Богу прощающему нас: Аллилуия.

(Этот кондак читается трижды, затем икос 1 и кондак 1)

Икос 1

Ангелов множество по Твоему, Мати наша, повелению ополчаются на избавление наше грозно. Ты же прими молитву сию:

Радуйся, ангелов на спасение наше посылающая; радуйся, Царице горних чинов, небесную их помощь нам дарующая. Радуйся, ангелом хранити нас повелевающая; радуйся, воинством ангельским врагов наших поражающая.

Радуйся, от горя, бед и гибели спасающая нас, бедствующих Избавительнице.

Кондак 1

Возбрани врагом нашим озлобляти нас и от Господа нашего отлучати конечно и нас научи пети Тебе, Богородице, весело:

Радуйся, от горя, бед и гибели спасающая нас, бедствующих Избавительнице.

Молитва

О, Мати Божия, помощи наша и защита, присно буди избавительница наша, на Тя бо уповаем и всегда вседушно Тя призываем, умилосердися и помози, пожалей и избави, приклони ухо Твое и наша скорбныя и слезныя молитвы приими, и якоже хочещи успокой и обрадуй нас, любящих Твоего возлюбленного Сына, Емуже слава, честь и поклонение, со Отцем и Святым Духом, во веки веков. Аминь.